

# NY Tenin'Andriamanitra dia tonga tamin'ny Mpaminany William Marrion Branham

## “Jesosy Kristy no Andriamanitra”

*Ankehitriny dia izao no fanambarana: Jesosy Kristy dia Andriamanitra.* Ilay Jehovah-n'ny Testamenta Taloha dia ilay Jesosin'ny Vaovao. Na sarotra be manao ahoana aza no hanandramanareo hanaovana azy, dia tsy ho voaporofonareo fa misy Andriamanitra TELO. Izany koa dia mila ny fanambarana avy amin'ny Fanahy Masina mba hahatonga anareo hahazo ny fahamarinana fa Tokana Izy. Mila fanambarana ny fahitana fa ilay Jehovah-n'ny Testamenta Taloha no ilay Jesosin'ny Vaovao. Nandady moramora tao amin'ny fiangonana i Satana ary nanajamba ny olona ny amin'io fahamarinana io. Ary rehefa jamba ny amin'izany izy ireo, tsy ela akory taorian'izay dia nijanona tsy nanao batisa tamin'ny Anaran'i Jesosy Kristy Tompo ny Fiangonan'i Roma.

Ekeko fa mila fanambarana tena izy avy amin'ny Fanahy Masina ny fahitana ny fahamarinana mikasika ny maha-Tokana an'Andriamanitra amin'izao andro izay iainantsika ao anatin'ny fampifamotorana be dia be ny Soratra Masina izao. Saingy ny fiangonana mijoro, mandresy kosa dia miorina eo ambonin'ny fanambarana ka dia afaka manantena an'Andriamanitra hanambara ny Fahamarinany amintsika isika. Na izany aza anefa, dia tsy dia mila fanambarana ny amin'ny batisan'ny rano ianareo. Eto mihitsy izany mazava be eo anoloanareo. Ho nety ho an'ireo apostoly ve ny ho voatarika ho diso lalana iray minitra monja tamin'ny baikon'ny Tompo mba hanaovana batisa amin'ny Anaran'ny Ray sy ny Zanaka ary ny Fanahy Masina ka avy eo dia hahita azy ireo indray ao anatin'ny tsy fankatoavana iniana atao? Fantatr'izy ireo hoe inona ilay Anarana, ary tsy misy toerana ao amin'ny Soratra Masina na iray aza ka nanaovan'izy ireo batisa tamin'ny fomba hafa ankoatry ny amin'ny Anaran'i Jesosy Kristy Tompo. Ny fisainana iombonana dia hilaza aminareo fa ny Bokin'ny Asan'ny Apostoly dia ny fiangonana am-perin'asa, ary izany no fomba nanaovan'izy ireo batisa, ary dia izany no fomba fanaovana batisa. Ankehitriny raha mihevitra ianareo fa henjana izany, dia ahoana no heveranareo an'ity? Na iza na iza tsy natao batisa tamin'ny Anaran'i Jesosy Tompo dia tsy maintsy naverina natao batisa indray.

Asan'ny Apostoly 19:1-6, "Ary raha mbola tany Korinto Apolosy, dia nitety ny tany ambony Paoly ka tonga tany Efesosy, dia nahita ny mpianatra sasany teo izy ka nanao taminy hoe, Efa noraisinareo ve ny Fanahy Masina fony vao nino ianareo? Fa ireo namaly azy nanao hoe, tsy renay akory fa efa nomena ny Fanahy Masina. Ary hoy izy tamin'ireo, Ho amin'inona ary no nanaovana batisa anareo? Dia hoy ireo, Ho amin'ny batisan'i Jaona. Fa hoy i Paoly, Jaona nanao ny batisan'ny fibebahana ka nilaza tamin'ny olona hino Izay ho avy manaraka azy, dia Jesosy. Ary raha nahare izany izy, dia natao batisa ho amin'ny Anaran'i Jesosy Tompo. Ary rehefa nametrahan'i Paoly tanana izy dia nilatsaka taminy ny Fanahy Masina; ary niteny tamin'ny teny tsy fantatra izy sady naminany." Io ilay izy. Ireo olona tsara tao Efesosy ireo dia nandre ny amin'ny fihavian'ny Mesia. Nitory Azy i Jaona. Natao batisa ho amin'ny fibebahana ny amin'ny fahotana izy ireo, NIANDRANDRA ny hino an'i Jesosy. Fa ankehitriny kosa no fotoana HITODIHANA amin'i Jesosy ka hanaovana batisa ho amin'ny FAMELANA ny heloka. Tonga ny fotoana handraisana ny Fanahy Masina. Ary rehefa natao batisa tamin'ny Anaran'i Jesosy Kristy Tompo izy ireo, dia nametraka ny tanany teo amin'izy ireo i Paoly ka dia tonga tamin'izy ireo ny Fanahy Masina.

Oh, ireo havana malala tao Efesosy ireo dia olona tsara; ary raha nisy olona nanana zo hahatsapa tena ho azo antoka, dia izy ireo. Mariho hoe toy ny inona ny halavitry ny nihavian'izy ireo. Avy lavitra izy ireo mba hanaiky ny fihavian'ny Mesia. Efa vonona ny ho Azy izy ireo. Saingy tsy hitanareo ve fa na dia teo aza izany dia tsy tafahaona Taminy izy ireo? Efa tonga Izy ary efa lasa. Nila ny natao batisa tamin'ny Anaran'i Jesosy Kristy Tompo izy ireo. Nila ny nofenoina ny Fanahy Masina izy ireo.

Raha natao batisa tamin'ny Anaran'i Jesosy Kristy Tompo ianareo, dia hameno anareo ny Fanahiny Masina Andriamanitra. Izany no Tenin'Andriamanitra. Ny Asan'ny Apostoly 19:6 izay novakiantsika teo dia ny fanatanterahana ny Asan'ny Apostoly 2:38, "Mibebaha, ary aoka samy hatao batisa amin'ny Anaran'i Jesosy Kristy *ianareo rehetra* mba hahazo famelana ny helokareo, ary ianareo handray ny fanomezana dia ny Fanahy Masina." Hitanareo, i Paoly, tamin'ny alalan'ny Fanahy Masina, dia tena niteny marina tokoa izay nolazain'i Petera tamin'ny alalan'ny Fanahy Masina. Ary izay nolazainy dia TSY AZO ovaina. Tsy maintsy mitovy ilay izy nanomboka tamin'ny Pentekosta ka mandra-pahavita batisa an'ilay voafidy farany indrindra. Galatiana 1:8, "Fa na izahay, na anjely avy any an-danitra aza, no mitory filazantsara hafa aminareo afa-tsy izay efa notorianay taminareo, aoka ho voaozona izy."

Ankehitriny ny sasany aminareo izay mino ny maha-Iray an'Andriamanitra dia manao batisa diso. Manao batisa ho amin'ny fanavaozana ianareo toy ny hoe nahavonjy anareo ny fanitrihana anareo tao anaty rano. Tsy tonga avy amin'ny rano ny fanavaozana; asan'ny Fanahy izany. Ilay lehilahy izay nanome ny baiko tamin'ny alalan'ny Fanahy Masina hoe, "Mibebaha ary aoka samy hatao batisa amin'ny Anaran'i Jesosy Tompo ianareo rehetra," dia tsy nilaza fa manavao ny rano. Nilaza izy fa fanamarinana ny "fieritreretana tsara eo anatrehan'Andriamanitra" fotsiny izany. Izay ihany. I Petera 3:21, "Izay mamonjy anareo koa ankehitriny dia ny batisa izay tenan'io tandindona io (tsy ny fanesorana ny fahalotoan'ny nofo anefa, fa ny fitadiavana ny fieritreretana tsara eo anatrehan'Andriamanitra,) amin'ny nitsanganan'i Jesosy Kristy tamin'ny maty." Mino izany aho.

Raha misy olona manana hevi-diso fa hoe ny tantara dia afaka manaporofa batisan'ny rano amin'ny fomba hafa ankoatry ny amin'ny Anaran'i Jesosy Kristy Tompo, dia hanoro hevitra anareo aho hamaky an'ireo tantara ka ianareo irery ihany no hahita. Ity manaraka ity dia fitantarana mariny Batisa iray izay niseho tao Roma tamin'ny taona 100 taorian'i Jesosy Kristy ary navoaka tao amin'ny gazety-boky TIME, tamin'ny 5 Desambra 1955. "Nanangana ny tanany ilay diakona, dia niditra avy teo amin'ny varavaran'ny batistera i Publius Decius. Nitsangana tao anatin'ilay dobo izay nisy rano hatreny am-balahany i Marus Vasca ilay mpivarokazo. Nitsiky i Publius raha niroboka tao anatin'ilay dobo hanakaiky azy. 'Kredisy?' hoy izy nanontany. 'Kredo', hoy ny navalin'i Publius. 'Mino aho fa ny famonjena ahy dia avy amin'i Jesosy ilay Kristy, Izay nohomboana tamin'ny hazo fijaliana raha nanapaka i Pontio Pilato. Maty niaraka Taminy aho mba hahazoako Fiainana Mandrakizay miaraka Aminy.' Avy eo dia nahatsapa sandry matanjaka izy nanohana azy raha navelany ho lavo nankany aoriana ny tenany tao anaty dobo, ka nandre ny feon'i Marcus teo an-tsofiny—'Izaho manao batisa anao amin'ny Anaran'i Jesosy Tompo'—raha nikatona nandrakotra azy ny rano mangatsiaka."

Mandra-pahaverin'ny fahamarinana (ary tsy niverina raha tsy amin'izao andro farany izao—nanomboka tamin'ny Nicee izany ka hatramin'ny fiovan'izao taonjato izao) dia tamin'ny Anaran'i Jesosy Kristy Tompo no nanaovan'izy ireo batisa. Saingy niverina indray izany. Tsy hain'i Satana hazonina ny fanambarana rehefa tian'ny Fanahy homena.

Eny, raha nisy Andriamanitra telo, dia azonareo natao tsara ny nanao batisa ho amin'ny Ray anankiray, sy Zanaka anankiray, ary Fanahy Masina anankiray. Saingy ny FANAMBARANA NOMENA AN'I JAONA kosa dia hoe ANDRIAMANITRA ANANKIRAY no misy ary ny Anarany dia JESOSY KRISTY TOMPO, ary ianareo dia manao batisa ho amin'Andriamanitra IRAY ary iray ihany. Izany no antony nanaovan'i Petera batisa tamin'ny fomba izay nanaovany azy tamin'ny Pentekosta. Tsy maintsy marina tamin'ilay fanambarana izy dia ny hoe, "Koa aoka ho fantatry ny taranak'Israely rehetra marimarina fa INY JESOSY, nohomboanareo tamin'ny hazo fijaliana iny dia efa nataon'Andriamanitra ho TOMPO SY KRISTY." Indro Izy, "JESOSY KRISTY TOMPO."

Raha Jesosy no "SADY" Tompo no Kristy, dia Izy (Jesosy) izany, fa tsy mety ho olon-kafa mihitsy, no "Ray, Zanaka, ary Fanahy Masina" ao amin'ny Olona IRAY voaseho teo amin'ny nofo. TSY hoe "Andriamanitra ao anatin'ny olona telo tsy akory, trinite masina," fa ANDRIAMANITRA IRAY, OLONA IRAY miaraka amin'ny titram-boninahitra telo, miaraka amin'ny andraikitra telo maneho an'ireo titram-boninahitra telo ireo. Henoy indray mandeha ity. Io Jesosy io ihany no "SADY Tompo no Kristy." Tompo (Ray) sy Kristy (Fanahy Masina) dia Jesosy, satria Izy (Jesosy) dia IZY ROA ireo (Tompo sy Kristy).

Raha tsy mampiseho antsika ny fanambarana marina ny amin'ny maha-Iray an'Andriamanitra izany, dia tsy hisy na inona na inona intsony haneho an'izany. Ny Tompo dia TSY anankiray hafa; Kristy dia TSY anankiray hafa. Io Jesosy io dia Jesosy Kristy Tompo — ANDRIAMANITRA IRAY.

Niteny tamin'i Jesosy Filipino indray andro hoe, "Tompoko, aseho anay ny Ray dia ampy ho anay izay." Jesosy nanao taminy hoe, "Izay ela izay no efa nitoerako teto aminareo ka tsy mbola fantatrao ihany va Aho? Izay nahita Ahy dia nahita ny Ray, koa ahoana no anaovanao hoe, Aseho anay ny Ray? Izaho sy ny Raiko dia Iray ihany." Nilaza an'io aho indray mandeha ary ramatoa anankiray no niteny hoe, "Andraso kely aloha, Atoa. Branham, ianao sy ny vadinao dia iray ihany." Hoy aho hoe, "Tsy araka io karazana io."

Hoy izy hoe, "Ahoana hoe azafady?"

Dia hoy aho taminy hoe, "Mahita ahy ve ianao?"

Hoy izy hoe, "Eny."

Hoy aho hoe, "Mahita ny vadiko ve ianao?"

Hoy izy hoe, "Tsia."

Hoy aho hoe, “Noho izany io maha-iray io dia karazana hafa, satria hoy Izy hoe, Raha mahita Ahy ianareo dia mahita ny Ray.”

Ny mpaminany dia nilaza fa ho hazavana amin’ny andro hariva izany. Ao amin’ity hira ity dia izao no voasoratra:

‘Ho Hazavana amin’ny andro hariva izany,  
Ny lalana mankany amin’ny Voninahitra dia azo antoka fa ho hitanareo,  
Ao amin’ny lalan’ny rano, izany no Hazavana anio,  
Nalevina ao amin’ny Anarana sarobidin’I Jesosy.  
Tanora sy antitra, mibebaha ny amin’ny fahotanareo rehetra,  
Hiditra ao tokoa ny Fanahy Masina.  
Tonga ny Hazavan’ny hariva,  
Tenazava-misynymaha-irayan’Andriamanitra sy Kristy.’

Vao tsy ela akory izay dia niresaka tamin’ny Raby Jiosy anankiray aho. Hoy izy tamiko hoe, “Ianareo Jentilisa dia tsy hahay handrasa an’Andriamanitra hizara telo ka hanome Azy ho an’ny Jiosy anankiray. Mbola mahafantatra tsaratsara kokoa noho izany izahay.”

Hoy aho taminy hoe, “Marina izany Raby, tsy mandrasa an’Andriamanitra ho telo akory izahay. Mino ny mpaminany ianao, sa tsy izany?”

Hoy izy hoe, “Izany tokoa mino aho.”

“Mino ny Isaia 9:6 ve ianao?”

“Eny.”

“Iza no lazain’ny mpaminany amin’io?”

“Mesia.”

Hoy aho hoe, “Inona no hifandraisan’I Mesia sy Andriamanitra?”

Hoy izy hoe, “Ho Andriamanitra Izy.”

Hoy aho hoe, “Marina izany.” Amena.

Tsy azonareo apetraka ao anatin’ny olona telo na fizarana telo Andriamanitra. Tsy ho hainareo ny hiteny amin’ny Jiosy iray fa misy Ray anankiray, sy Zanaka anankiray, ary Fanahy Masina anankiray. Ho lazainy aminao avy hatrany hoe avy taiza izany hevitra izany. Fantatry ny Jiosy fa tao amin’ny Fivoriamben’ny

Nicee no nananganana an'io fotom-pampianarana io. Tsy mahagaga raha vingavingainy ho mpanompo sampy isika.

Miresaka ny amin'Andriamanitra anankiray izay tsy miova isika. Ny Jiosy dia mino an'izany koa. Fa ny fiangonana no nanova an'ilay Andriamanitra tsy miova avy amin'ny IRAY ho lasa TELO. Saingy ny hazavana kosa dia miverina amin'ny hariva mody masoandro. *Mahavariana tokoa fa izao fahamarinana izao dia tonga amin'ny fotoana izay iverenan'ny Jiosy any Palestina.* Andriamanitra sy Kristy dia IRAY. Io Jesosy io dia SADY TOMPO NO KRISTY.

I Jaona dia nandray ny fanambarana, ary JESOSY izany Fanambarana izany, ary maneho ny Tenany mihitsy Izy eto amin'ny Soratra Masina. — “*IZAHO Ilay Taloha, Ilay Ankehitriny ary Ho Avy, dia ny Tsitoha. Amena.*”

Raha mihoatra anareo ny fanambarana, dia miandrindra ary tadiavo Andriamanitra ny amin'izany. Izay ihany no fomba tokana hahatonga anareo hahazo an'izany. Ny fanambarana dia tsy maintsy avy amin'Andriamanitra. Tsy tonga avy amin'ny fahaizana, talenta ara-boajanaharin'ny olombelona mihitsy izany, fa avy amin'ny hosotrin'ny Fanahy. Azonareo tadidiana ny Soratra Masina, ary na dia tsara tokoa aza izany, dia tsy hahavita azy izany. Tsy maintsy fanambarana avy amin'Andriamanitra izany. Voalaza ao amin'ny Tenin'Andriamanitra fa tsy misy olona afaka miteny fa Jesosy no Kristy raha tsy avy amin'ny alalan'ny Fanahy Masina. Tsy maintsy mandray ny Fanahy Masina ianareo ka aorian'izany, ary aorian'izany ihany, no hahafahan'ny Fanahy manome anareo ny fanambarana fa Jesosy no Kristy: Andriamanitra, ilay Voahosotra.

(Nalaina avy tamin'ny *Ny Fanehoana an'ireo Taona Fiton'ny Fiangonana.*)

MALAGASY

©2011 VGR, ALL RIGHTS RESERVED

VOICE OF GOD RECORDINGS

P.O. Box 950, Jeffersonville, Indiana 47131 U.S.A.

[www.branham.org](http://www.branham.org)

## Filazana fahefan'ny tompon'ny boky

Tsy azo adika. Ity boky ity dia azo atao printy amin'ny fanaovam-printy ao an-trano ho an'ny fampiasana manokana na ho zaraina, tsy misy sarany, ho fitaovana iray hanaparitahana ny Filazantsaran'i Jesosy Kristy. Ity boky ity dia tsy azo amidy, na adika indray amin'ny refy lehibe, na alefa amin'ny siteweb iray, na tehirizina amin'ny fomba nisy nanesorana, na adika amin'ny fiteny hafa, na ampiasaina ho fangataham-bola raha tsy misy alàlana voasoratra mazava avy amin'ny Voice Of God Recordings®.

Ho an'ny fanazavana fanampiny na ho an'ny fitaovana hafa efa azo raisina, dia iangaviana hifandray amin'ny:

**VOICE OF GOD RECORDINGS**

**P.O. BOX 950, JEFFERSONVILLE, INDIANA 47131 U.S.A.**

[www.branham.org](http://www.branham.org)